



**Uunga siunnersuut: Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq. (Meeqqat illersuisuata aamma Meeqqat pillugit Siunnersuisoqatigiit ilaasortaasa piffissamik toqqagaaffiannik allannguneq)**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)  
(Siullermeerneqarnera)

Siullermik Demokraatit Meeqqat illersuisuat taassumallu allaffeqarfia nunatsinni isorartoqisumi meeqqat tusaaneqarnissaanut suliarujussuanut qujaffigerusuppagut. Paasissutissarpassuarnik katersusisimmammata paasarpassuarnik ingerlatitseqqittarsimmammata minnerunngittumillu Meeqqat illersuisuat inuiaqatigiinnilu tatiginnegatigiisumik ataqatigiilersimaneq pinngortissimmammassuk qujaffigerusuppagut. Tamannami pequtaalluni meeqqat atugarisai piviusut paasinissaat tunngavissaq pinngorsimavoq. Meeqqat ullumikkut atungarisaanik tunngasunik ilisimasat aaqqiinernermit iluaqutigisorujuusimavagut, taamalillutalu inuiaqatigiinnut qaamanerumik siunissaqalersitsisinnaangorsimalluta.

Siunnersuummi siullertut allunguuteqarnissamut kissaateqarsimaneq massakkutuut ukiuni pingasuni sivilissuseqarnani ukiuni sisamani sivilissuseqartussatut tunngavigineqartut saqqummiunneqarsimasullu pissusissamisoortutut isigaavut. Sivitsuinissamut kissaat Meeqqat illersuisuata inuiaqatigiillu akornanni ataqatigiinnerulernissamut suliaq tunngavililiunneqarsimavoq, aammattaarlu angalalluni meeqqat atungarisaanik tikkuussisunik paasissutissanik katersinnermit ataqatigiissaarinnermilu piffissarujussuup atornerqartarnera tunngaviliunneqarluni.

Erseqqissarusuppapulli siunnersuisoqatigiinnut inuttassanik toqqaaqqinnermit suleqatigiinnermit atassuteqaatit pinngorteqqinniinnerani piffissaq sivikinnerusoq atornerqarnera takorloorsinnaagatsigu misilittagaqarnerlu sakkugalugit meeqqanut ilaqutaasunullu atassuteqarnerq siammarsinnaaneranut periarfissaqartoqalissamat, taamaalillunilu suliniutit amerlanerit pinngortinneqarsinnaangorlutik.

Isumaqarpugulli inuiaqatigiittut sianingisariaqaripput Meeqqat illersuisuanut tatiginninnerujussuaqartoq- inuiaqatigiittut tatiginninneq ilutsinni annertunerusoq takutittariaqaripput, taamaalillunilu Meeqqat illersuisuat kisimiilluni meeqqat toqqissisimanerunissaanut aqqutissiuussisuussaangimmat. Tamanna angajoqqaatut minnerunngitsumillu inuiaqatigiittut kulturimik ingerlatitseqqittussatut akisussaaffimmik tigusisariaqarpugut. Taamaalinnikkut Meeqqat illersuisuat inummut ataatsimut aattuumassuteqannginnissaata nalorninartua pinaveersaassuarput, inuiaqatigiittullu meeqqat illersornissaanut tamatta kivitseqataanikkut suleqataalissalluta, - uagut, angajoqqaat, inersimasut, ulluinnarnilu meqqanik sullissisuusugut.



Sianigisariaqarparput Meeqqat illersuisuata suliarpassui paasisaqarnerulersitsisuusimammata, taamaalinikkullu akisussaaffeqalerpugut MIO-p Inatsisartunut Naalakkersuisunullu saqqummiuttangaanik politikikkut tigussaassumik ataqatigiimmillu aaqqissuussamik tigusisussamik peqartariaqarmat. Taamaammallu pingaaruteqarpoq meeqqap, ilaqutaasut, suleqataasullu allat Inatsisartunit politikikkut suleqataarusussutsimik takutitsineq pisariaqartinneqarmat, ataqatigiittumillu sullinneqarnissamik periarfissinneqartariaqartut. Tammana Demokratinit suleqataaffigerusupparput.

Kissatigisap aappaa Meeqqat pillugit Siunnersuisoqatigiit aamma ukiut sisamakkaarlugit toqqarneqartarlissasut taperserparput. Taamatullu Meeqqat pisinnaatitaaffiit sullissivimmi suliasat atajuartuunissaat pitsaanerunissaallu anguniarlugu ilaasortat ukiut marlukkaarlugit taarserneqartassasut kissatigineqarpoq. Nuannaarutigaaarpud inunnik ataasiakkaanik suliamik tunngaveqalertooneq pinaveersaarniarneqalermat meeqqat pillugit Siunnersuisoqatigiit ataatsikkut tamakkerlugit taarserneqassaarneratigut.

Taamatut oqaaseqarluta Demokraatinit siunnersuut taperserusupparput Inatsisartullu Ilaqutariinnermut Peqqissutsimullu ataatsimiititaliaanut innersuullugu.